

**BASES DA CONVOCATORIA DE
AXUDAS A DEPORTISTAS
GALEGOS/AS DE ALTO NIVEL.
PRIMEIRA FASE**

**“AXUDAS RETO GALICIA-TOKYO
CON IGUALDADE 2021”**

**(DEPORTISTAS GALEGOS/AS
CONVOCADOS/AS OFICIALMENTE PARA
PARTICIPAR NOS XOGOS
OLÍMPICOS/PARALÍMPICOS DE TOKYO 2020)**

**CÓDIGO DE PROCEDIMENTO ADMINISTRATIVO
DE100A**

INDICE

1. INTRODUCCIÓN.....	3
2. OBXECTO.....	4
3. PERSOAS BENEFICIARIAS.....	4
4. FINANCIAMENTO ORZAMENTARIO.....	4
5. SOLICITUDES.....	5
6. INSTRUCCIÓN E TRAMITACIÓN DO PROCEDIMENTO.....	9
7. PAGAMENTO.....	11
8. OBRIGAS DAS PERSOAS BENEFICIARIAS.....	12
9. MODIFICACIÓN DA RESOLUCIÓN, REVOGACIÓN E REINTEGRO.....	12
10. RÉXIME XURÍDICO.....	12

1. INTRODUCCIÓN

A Fundación Deporte Galego é unha fundación do sector público coa condición de medio propio e instrumental da Secretaría Xeral para o Deporte, asumindo como finalidade fundacional a promoción do deporte en Galicia e, de conformidade cos seus estatutos ten encomendada, entre outras funcións, o fomento do deporte de alta competición en Galicia mediante, entre outras fórmulas, a realización de patrocinios, outorgamento de becas e concesión de axudas.

Tendo en conta que en 2021 celebraranse os Xogos Olímpicos/Paralímpicos de Tokyo 2020, a Fundación Deporte Galego está a desenvolver un plan de axudas aos deportistas galegos/as que están a competir no máis alto nivel deportivo de ámbito estatal, europeo e mundial, entre os que se atopan aqueles/as con opcións de acudir aos devanditos XXOO/XXPP. Inclúese tamén, a liña de axudas a deportistas galegos/as de alto nivel (DGAN) que vén concedendo a Fundación no seu obxecto de promoción do deporte de alto nivel da Comunidade Autónoma.

No ámbito do acordo de colaboración entre a Secretaría Xeral da Igualdade da Consellería de Emprego e Igualdade e a Secretaría Xeral para o Deporte, para desenvolver medidas previstas no Pacto de Estado contra a violencia de xénero, a Secretaría Xeral da Igualdade súmase ao apoio desta convocatoria na procura de deseñar e transmitir contidos relacionados coa loita pola tolerancia, igualdade e non violencia no deporte e na vida, entendendo esta actuación como un medio fundamental para a educación da sociedade sen discriminación e que incumbe a todas as persoas.

Do mesmo xeito que nas edicións olímpicas anteriores de Londres 2012 e Río 2016, o desenvolvemento desta actuación efectuarase a través dunha convocatoria de axudas a deportistas galegos/as de alto nivel (DGAN), con dúas fases consecutivas:

- Unha primeira fase que se abre coa publicación das presentes bases, denominada AXUDAS RETO GALICIA-TOKYO CON IGUALDADE 2021, orientada a aqueles/as deportistas galegos/as incluídos na listaxe definitiva de convocados/convocatoria oficial definitiva para os XXOO/XXPP de TOKYO 2020, sempre e cando cumpran cos requisitos para ser beneficiarios/as, e podendo solicitálo no mesmo momento en que cumpran cos criterios establecidos. Serán tres os tipos de axudas, con requisitos propios e diferenciadores.

- Unha segunda fase a continuación da anterior, orientada ao resto de Deportistas con recoñecemento e vigor pola Secretaría Xeral para o Deporte como DGAN nos anos 2020 e 2021, que reúnan os requisitos para ser beneficiarios/as de acordo aos criterios establecidos que serán publicados nas bases desta segunda fase.

A presente convocatoria non é substitutiva doutras convocatorias que poida publicar a Secretaría Xeral para o Deporte.

2. OBXECTO

Esta primeira convocatoria ten por obxecto establecer as bases reguladoras da concesión das AXUDAS RETO GALICIA-TOKYO CON IGUALDADE 2021, dirixida a apoiar aos/ás deportistas galegos/as incluídos na *listaxe de convocados/convocatoria oficial definitiva* para os XXOO/XXPP de TOKYO 2020 e que cumpran cos requisitos establecidos no apartado 6.3. destas bases.

Co fin de facilitar a identificación dos formularios de inicio na sede electrónica da Xunta de Galicia, habilítase un enlace na Guía de procedementos e servizos co código DE100A.

3. PERSOAS BENEFICIARIAS

Poderán ser persoas beneficiarias desta convocatoria os/as deportistas que cumpran os seguintes requisitos:

- a. Residir actualmente en Galicia ou ter residido durante a súa etapa de formación deportiva e reunir un dos seguintes requisitos:
 - Ter nado en Galicia.
 - Ter unha vinculación familiar ata o segundo grao de cosanguineidade en Galicia.
- b. Ter licenza deportiva vixente nunha especialidade deportiva incluída no programa dos XXOO/XXPP de Tokyo 2020, expedida por unha federación deportiva galega dende alomenos o 1 de xaneiro do 2020. No caso dos deportistas que, cumprindo co apartado anterior, non teñan licenza federativa galega por ter que estar adestrando e competindo fóra de Galicia, a acreditación deste requisito efectuarase mediante certificación doutra federación territorial, española ou internacional.
- c. Cumprir cos criterios establecidos no punto 6.3. destas bases, acreditando oficialmente que o seu nome estea incluído na *listaxe definitiva de convocados/convocatoria oficial definitiva* para os XXOO/XXPP de Tokyo 2020.
- d. Non estar cumprindo sanción disciplinaria ou administrativa en materia deportiva de carácter grave ou moi grave.
- e. Estar adestrando e competindo no 2021.

Non poderán obter a condición de persoa beneficiaria os/as solicitantes nos que conorra algunha das circunstancias previstas no artigo 10.2 da Lei 9/2007, do 13 de xuño, de subvencións de Galicia.

4. FINANCIAMENTO ORZAMENTARIO

As axudas concedidas de conformidade coas presentes bases serán imputadas ao orzamento do ano 2021 da Fundación Deporte Galego con cargo á partida "1. Axudas Monetarias", por un importe máximo de 300.000 euros. O importe acumulado das axudas concedidas non poderá exceder o amentado importe máximo.

O importe das axudas está a ser financiada con fondos do Pacto de Estado contra a Violencia de Xénero (Ministerio da Presidencia, Relacións coas Cortes e Igualdade).

Sen prexuízo do anterior, en virtude dun incremento dos fondos asignados a este fin, a Fundación, se o considera oportuno, poderá acordar a ampliación do importe máximo do crédito dispoñible para esta liña de axudas. En todo caso, dita ampliación quedará condicionada á declaración de dispoñibilidade do crédito necesario por parte da Fundación. A resolución de ampliación do crédito dispoñible publicárase nos mesmos medios que a convocatoria e, en ningún caso, conlevará a apertura dun novo prazo de presentación de solicitudes.

5. SOLICITUDES

5.1. Forma e lugar de presentación de solicitudes.

As/os deportistas solicitantes interesadas/os presentarán a solicitude (Anexo I) preferentemente por medios electrónicos a través do formulario normalizado dispoñible na sede electrónica da Xunta de Galicia, <https://sede.xunta.gal>.

Para a presentación das solicitudes de forma electrónica poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

Opcionalmente, poderanse presentar as solicitudes presencialmente en formato papel orixinal no **Rexistro da Fundación Deporte Galego** (R/ Madrid, 2-4, 2º (Fontiñas) – 15781 Santiago de Compostela), cuxo horario de rexistro aos efectos de presentación das solicitudes referidas ás presentes bases será de 9:00 a 14:00 horas.

Tamén poderá presentarse a solicitude en calquera dos lugares previstos no artigo 16 da Lei 39/2015, do 1 de outubro, do procedemento administrativo común das administracións públicas.

No caso de efectuar a presentación da solicitude nun rexistro oficial diferente ao propio da Fundación Deporte Galego, as persoas deportistas solicitantes veranse obrigadas a comunicalo no mesmo día por correo electrónico ao enderezo da Fundación (fundaciondeportegalego.pr@xunta.gal), remitindo anexa a propia solicitude e a xustificación de presentación ou imposición, no que deberá figurar a correspondente data. O incumprimento do disposto no presente parágrafo implicará que, para todos os efectos, a Fundación considerará presentada a solicitude na data en que sexa efectivamente recibida no Rexistro da Fundación Deporte Galego.

5.2. Documentación complementaria

As persoas interesadas deberán achegar tamén obrigatoriamente en todos os casos coa solicitude (**Anexo I**), a seguinte documentación:

- **Anexo II. Certificado orixinal da Federación correspondente.** Obrigatorio en tódolos casos. No caso da presentación telemática, serán asinados dixitalmente (non de forma manuscrita) pola/o secretaria/o e presidenta/e. Cando sexan presentados de forma presencial, as sinaturas sí serán manuscritas e deberán incluír tamén o cuño oficial da federación. Non serán aceptados en ningún caso certificados presentados en formato escaneado sen sinatura oficial.
- **Anexo III. Autorización de representación.** Unicamente nos casos nos que a persoa solicitante outorgue facultades de representación a outra persoa inicialmente allea á solicitud.
- **Documento acreditativo da patria potestade ou tutela** (copia do libro de familia ou calquera outro documento que o acredite). Unicamente no caso de persoas solicitantes menores de idade e xunto co anterior Anexo II. Autorización de representación.
- Os/as deportistas que por necesidades da súa práctica deportiva teñan que estar adestrando e competindo fóra de Galicia, e que poden ser beneficiarios/as dunha "AXUDA RETO GALICIA-TOKYO CON IGUALDADE 2021.", **deberán acreditar a súa residencia en Galicia** durante a súa etapa de formación deportiva, así como un dos seguintes requisitos: o seu nacemento en Galicia ou ter unha vinculación familiar ata o segundo grao de cosanguineidade en Galicia.

A documentación complementaria presentarase preferiblemente por vía electrónica. Opcionalmente, as persoas interesadas tamén poderán presentar a documentación complementaria presencialmente nos lugares indicados no apartado 5.1 das bases. No caso de presentación nun rexistro oficial diferente ao propio da Fundación Deporte Galego, as persoas deportistas solicitantes veranse obrigadas a comunicalo no mesmo día por correo electrónico ao enderezo da Fundación (fundaciondeportegalego.pr@xunta.gal), remitindo anexa a propia documentación e a xustificación de presentación ou imposición, no que deberá figurar a correspondente data. O incumprimento da condición anterior implicará que, para todos os efectos, a Fundación considerará presentada a solicitud na data en que sexa efectivamente recibida no Rexistro da Fundación Deporte Galego.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento o exixa ou existan dúbidas derivadas da calidade da copia, a Administración poderá solicitar de maneira motivada o cotexo das copias achegadas pola persoa interesada, para o que poderán requirir a exhibición do documento ou da información orixinal.

Sempre que se realice a presentación de documentos separadamente da solicitud, deberase indicar o código **DE100A** e o órgano responsable do procedemento (FUNDACIÓN DEPORTE GALEGO), o número de rexistro de entrada da solicitud e o número de expediente se se dispón del. A presentación separada, da documentación complementaria, de ser o caso, efectuarase preferentemente por vía electrónica.

5.3. Comprobación de datos.

Para a tramitación deste procedemento consultarase automaticamente os datos

incluídos nos seguintes documentos en poder da Administración actuante ou elaborados polas Administracións públicas agás que a persoa interesada se opoña á súa consulta:

- DNI/NIE da persoa solicitante.
- DNI/NIE da persoa representante.
- Certificación positiva expedida pola Tesourería Xeral da Seguridade Social correspondente, acreditativa de que a persoa solicitante se atopa ao corrente do cumprimento das súas obrigas coa Seguridade Social.
- Certificación positiva expedida pola Axencia Estatal da Administración Tributaria (AEAT) que acredita que a persoa solicitante se atopa ao corrente no cumprimento das súas obrigas tributarias.
- Certificación positiva expedida polo órgano competente da Consellería de Facenda (Xunta de Galicia) na que se teña constancia que non ten débedas pendentes de natureza tributaria coa Facenda Pública da Comunidade Autónoma de Galicia.

No caso de que as persoas interesadas se opoñan a esta consulta, deberán indicalo no cadro correspondente habilitado no formulario de inicio e achegar os documentos.

Cando así o esixa a normativa aplicable solicitarase o consentimento expreso da persoa interesada para realizar a consulta.

Excepcionalmente, no caso de que algunha circunstancia imposibilitase a obtención dos citados datos, poderase solicitar ás persoas interesadas a presentación dos documentos correspondentes.

5.4. Compatibilidade con outras axudas

Estas axudas serán compatibles con premios ou axudas económicas recibidas durante o ano 2021 procedentes de calquera outra administración, ou de entes públicos ou privados, galegos, estatais e/ou da Unión Europea ou de organismos internacionais -sen prexuízo da obriga de comunicar ao órgano concedente a súa obtención-, e incompatibles no caso de premios ou axudas económicas para deportistas concedidas por outras Comunidades Autónomas durante o ano 2021.

Será obrigatorio declarar as axudas solicitadas e/ou concedidas para o mesmo fin, segundo o propio **Anexo I** de solicitude.

5.5. Prazo de presentación de solicitudes

O prazo de presentación das solicitudes comezará a contar dende o seguinte día da publicación do anuncio destas bases no Diario Oficial de Galicia. O prazo permanecerá aberto permanentemente ata o 30 de setembro de 2021.

5.6. Corrección de solicitudes

Unha vez revisada a documentación, publicarase a lista das solicitudes admitidas e daquelas que conteñan erros ou deficiencias na páxina web deporte.xunta.gal, dispoñendo a partires dese momento de **10 días hábiles** para que sexan corrixidas, con indicación de que, se así non o fixese, teráselle por desistido da súa petición,

logo dunha resolución expresa por parte da Fundación na que así se declare a desistencia.

5.7. Notificacións

As notificacións de resolucións e actos administrativos practicaranse preferentemente por medios electrónicos. As persoas interesadas poderán decidir e comunicar en calquera momento que as notificacións sucesivas se practiquen ou deixen de practicar por medios electrónicos mediante os modelos normalizados dispoñibles.

A persoa interesada deberá manifestar expresamente a modalidade escollida para a notificación (electrónica ou en papel) no formulario.

No caso de optar pola notificación en papel practicarase a notificación segundo o establecido na normativa reguladora do procedemento administrativo común.

De conformidade co artigo 45.2 da Lei 4/2019, do 17 de xullo, de administración dixital de Galicia, as notificacións electrónicas practicaranse mediante a comparecencia na sede electrónica da Xunta de Galicia e a través do sistema de notificacións electrónicas de Galicia, Notifica.gal. Este sistema remitirá ás persoas interesadas avisos da posta a disposición das notificacións á conta de correo e/ou teléfono móbil que consten na solicitude. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.

As notificacións por medios electrónicos entenderanse practicadas no momento no que se produza o acceso ao seu contido, e entenderase rexeitada cando transcorresen dez días naturais desde a posta a disposición da notificación sen que se acceda ao seu contido.

Se o envío da notificación electrónica non fose posible por problemas técnicos, practicarase a notificación polos medios previstos na normativa reguladora do procedemento administrativo común.

5.8. Trámites posteriores á presentación de solicitudes

A sede electrónica da Xunta de Galicia permite as persoas interesadas realizar trámites electrónicos, con posterioridade ao inicio do expediente, accedendo á Carpeta cidadá da persoa interesada. Opcionalmente, tamén poderán tramitarse presencialmente na forma e nos lugares indicados no apartado 5.1 das bases.

5.9. Transparencia e bo goberno

Deberá darse cumprimento ás obrigas de transparencia contidas no artigo 17 da Lei 1/2016, do 18 de xaneiro, de transparencia e bo goberno, e no artigo 15 da Lei 9/2007, do 13 de xuño, de subvencións de Galicia.

En virtude do disposto no artigo 4 da Lei 1/2016, do 18 de xaneiro, de transparencia e bo goberno, as persoas físicas e xurídicas beneficiarias de subvencións están obrigadas a subministrar á Administración, ao organismo ou á entidade das previstas

no artigo 3.1 da Lei 1/2016, do 18 de xaneiro, á que se atopen vinculadas, previo requirimento, toda a información necesaria para o cumprimento por aquela das obrigas previstas no título I da citada lei.

6. INSTRUCIÓN E TRAMITACIÓN DO PROCEDIMENTO.

6.1. Órgano de instrución.

O Director-Xerente da Fundación Deporte Galego será o órgano instrutor do procedemento, responsable da tramitación do mesmo.

Serán funcións do órgano instrutor:

- Revisar a documentación a presentar polos/as deportistas coa solicitude de axuda e publicar a corrección de solicitudes, se é o caso.
- Realizar de oficio cantas actuacións estime necesarias para a determinación, o coñecemento e a comprobación dos datos en virtude dos cales se debe formular a proposta de resolución.
- Elevar a proposta de resolución das axudas ao Padroado da Fundación Deporte Galego, para a resolución definitiva.

O órgano instrutor poderá utilizar e solicitar canta documentación considere precisa para unha mellor valoración e comprobación do proxecto.

6.2. Tipos de axudas, criterios de valoración e regras comúns a todas elas.

Establécense os seguintes tipos de axudas:

TIPO DE AXUDA GALICIA-TOKYO 2021	DIRIXIDA A DEPORTISTAS GALEGOS/AS CUXO NOME APAREZA INCLUÍDO NA LISTAXE DEFINITIVA DE CONVOCADOS/CONVOCATORIA OFICIAL DEFINITIVA PARA OS XXOO/XXPP DE TOKYO 2020 E ADEMÁIS	IMPORTE MÁXIMO
AXUDA RETO CON IGUALDADE GALICIA-TOKYO 1	Teñan participado representando ao equipo olímpico/paralímpico español en catro ou máis edicións anteriores xa celebradas dos XXOO/XXPP ou acadaran medalla nalgunha participación olímpica/paralímpica	10.000 €
AXUDA RETO CON IGUALDADE GALICIA-TOKYO 2	Teñan participado representando ao equipo olímpico/paralímpico español en tres ou menos edicións xa celebradas dos XXOO/XXPP e non acadaran medalla.	8.000 €
AXUDA RETO CON IGUALDADE GALICIA-TOKYO 3	Non teñan participado en edición anterior algunha dos XXOO/XXPP.	5.000 €
AXUDA RETO CON IGUALDADE GALICIA-TOKYO D.A.	Deportistas que acrediten competir como deportistas de apoio ou guía de deportistas DGAN paralímpicos/as ou de deporte adaptado clasificados para os XXPP. DGAN que exerzan como deportistas de apoio ou guía de outros deportistas paralímpicos/as clasificados para os XXPP.	50% da axuda do deportista

As axudas axustarase ás seguintes regras:

- Todas as axudas concederanse en réxime de concorrencia non competitiva.
- A suma total de axudas concedidas non poderá superar o orzamento máximo previsto no punto 4 destas bases.
- Concederase unha única axuda por deportista. A única excepción a esta regra será o feito de que algunha persoa deportista se clasifique para dúas ou máis modalidades deportivas diferentes (non especialidades diferentes, nin probas diferentes), en cuxo caso percibirá a primeira axuda completa e unha segunda axuda ou sucesivas, cada unha co 50% do importe total da primeira axuda completa.
- A todas as axudas aplicaráselles as retencións legalmente vixentes en base á normativa do Imposto da Renda das Persoas Físicas.

6.3. Procedemento de concesión

As axudas concederanse en réxime de concorrencia non competitiva. En consecuencia, non será necesario a comparación e prelación das solicitudes presentadas, atendéndose unicamente ao cumprimento efectivo dos requisitos esixidos para obter a condición de beneficiaria e á subsistencia de crédito na data de presentación da solicitude.

6.4. Resolución de adxudicación

Presentada a solicitude o órgano instructor procederá a comprobar que se reúnen as condicións esixidas para obter a condición de beneficiaria das liñas de axudas. De ser o caso, o órgano instructor elevará a proposta de resolución ao Padroado da Fundación Deporte Galego para que este resolva.

A resolución de concesión ditarase nun prazo máximo de 2 meses a contar dende a data de presentación da solicitude, nos termos indicados no apartado 5.1 das bases. O vencemento do citado prazo sen que se notifique a resolución expresa, lexítima ao interesado para entender desestimada a súa solicitude.

As listaxes das axudas concedidas serán notificadas ao interesado e publicaranse na páxina web **deporte.xunta.gal**.

6.5. Aceptación da resolución

Publicadas as correspondentes resolucións, as persoas beneficiarias disporán dun prazo de 10 días hábiles para a súa aceptación ou para presentar a súa renuncia, transcorrido o cal sen que se producise manifestación expresa, entenderase tacitamente aceptada.

No caso de que as axudas outorgadas non sexan aceptadas polas persoas beneficiarias ou que posteriormente á súa concesión se renuncie a elas, así como nos supostos do seu reintegro, non se alterará a distribución inicial do crédito entre todas as solicitudes .

6.6. Reclamacións

Contra as resolucións da concesión de axudas poderán interperse reclamacións perante o órgano de adxudicación, no prazo máximo de **10 días hábiles** a contar desde a publicación das listas de persoas beneficiarias das axudas na páxina web deporte.xunta.gal, e na sede electrónica da Xunta de Galicia, <https://sede.xunta.gal>., con carácter previo á vía xudicial. O prazo para resolver as reclamacións será de dous meses.

7. PAGAMENTO.

Unha vez que o Padroado da Fundación efectúe a resolución procederá ao pagamento da axuda aos/ás beneficiarios/as por transferencia bancaria, sen ter que esperar ao remate temporal da convocatoria.

Para o pagamento da axuda concedida, as persoas beneficiarias das axudas deberá presentar os certificados de estar ao corrente das obrigas coa Axencia Estatal da Administración Tributaria, a Seguridade Social e a Xunta de Galicia (Consellería de Facenda). Non será necesario presentar estes certificados se os presentados coa solicitude están en vigor no momento de proceder ao pagamento.

8. OBRIGAS DAS PERSOAS BENEFICIARIAS.

As persoas beneficiarias deberán cumprir coas obrigas previstas na Lei 9/2007, do 13 de xuño, de subvencións de Galicia. En particular, durante o presente exercicio e o seguinte:

- Aceptar e cumprir todas as estipulacións establecidas nas bases desta convocatoria.
- Comunicar calquera eventualidade significativa no proxecto deportivo.
- Someterse ás actuacións de comprobación que, no seu caso, puidera efectuar a Fundación Deporte Galego, así como calquera outra actuación, sexa de comprobación e control financeiro, que poidan realizar os órganos de control competentes, tanto galegos como estatais ou comunitarios, para o que se achegará canta información lle sexa requirida no exercicio das actuacións correspondentes.
- Comunicarlle á Fundación Deporte Galego a obtención doutras axudas para o mesmo fin.
- Acreditar con anterioridade a que se dite a proposta de resolución de concesión que se encontra ao corrente no cumprimento das súas obrigas tributarias e fronte á Seguridade Social e que non ten pendente de pagamento ningunha outra débeda coa Xunta de Galicia, na forma que se determina no punto 5.3. destas bases.
- Participar nas actividades de difusión coa fin de demostrar o grao de aproveitamento destas axudas, así como nas actividades de promoción do deporte que poida programar a Secretaría Xeral para o Deporte, a Fundación Deporte Galego e/ou os seus patrocinadores e/ou entes colaboradores.

- Colaborar coa Secretaría Xeral de Igualdade na promoción do programa “*Reto 365 pola Igualdade*” e participar nun acto organizado pola Secretaría Xeral para o Deporte-Fundación Deporte Galego para a difusión do citado programa.
- Proceder ao reintegro dos fondos percibidos nos supostos establecidos no apartado 9 destas bases.

9. MODIFICACIÓN DA RESOLUCIÓN, REVOGACIÓN E REINTEGRO.

9.1. Modificación da resolución

Toda alteración das condicións tidas en conta para a concesión das axudas poderá dar lugar á modificación da resolución de concesión e, eventualmente, á súa revogación.

9.2. Revogación e reintegro.

A Fundación poderá proceder, tras o apercibimento previo ás persoas beneficiarias, á revogación e/ou esixencia do reintegro da axuda, así como dos xuros de demora correspondente, nos supostos de:

- Obtención da axuda falseando as condicións requiridas para iso ou ocultando aquelas que o impedisen.
- Incumprimento das obrigas como persoa beneficiaria establecidas nestas bases.
- Resistencia, escusa, obstrución ou negativa ás actuacións de comprobación e control financeiro mencionadas no apartado 8 destas bases que se puideran acometer, no seu caso, así como o incumprimento das obrigas contables, rexistras ou de conservación de documentos.
- Calquera incumprimento das normas fixadas polas autoridades en materia de loita anti-dopaxe, en materia de loita contra a violencia no deporte e en materia de protección integral contra a violencia de xénero.

10. RÉXIME XURÍDICO.

As presentes bases rexeranse polo dereito privado, séndolle aplicable o artigo 120 da Lei 16/2010, de 17 de decembro, de organización e funcionamento da Administración xeral e do Sector Público de Galicia, os principios de xestión contidos no artigo 5.2. da Lei 9/2007, do 13 de xuño, de subvencións de Galicia e os de información aos que fai referencia o artigo 16 do mesmo texto legal, así como os artigos do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, que desenvolven ditos principios de xestión e publicidade